



Les partidas ofiziales dla sajun de retüda a metü man cun i cuarti de finala de Copa Provinzia. Por La Val na devënta y na pordüda. Sciöch vigne ann vëgn i cuarti de finala de Copa Provinzia tignis dan le scomenciamënt dl campionat de retüda, preodü cun le 19 de merz.

I ultims fin dl'edma à la squadra afronté i cuarti sot forma de triangolar cun döes squadre de terza categoria, le Mölten y l'ACD Val Badia. Ai 27 de furá é la miú squadra dl rode A, le Mölten, ruvé a La Ila (partida spostada sön le ciamp da La Ila a gauja dla nēi) por la prüma cuntra i

ladins da La Val. La formaziun de ciasa fej na bela parüda y fej süa chësta pröma partida ofiziala cun le resultat de 4-2. Insciö pëia ia bun la sajun por i ladins che pó se arjigné a afronté i avversars dl acd Val Badia ai 13 de merz a La Ila.

Na bela proa dan che le campionat mëtes man, na partida plajora da ciaré pro, ulache la Val Badia à la miú sön La Val por 3-1. Do ester jüs in vantaje do la chert d'ora cun Alex E. dal limit de puniziun, é dões dijatenziuns dezisives por le radopl dla VB: le gol dla parité rōia sön puniziun/crossada amez ulache l'atacant é plö asvelt de taié fora la defenjiun y da rebat le curan te porta al jore. Al ne passa tröp por le radopl, sön puniziun dal limit de Alex Stampfer ti sciampa le palé fora dles mans al portier Sepl, le sogadú Emanuel Dorigo é le pröm de ruvé dan porta y á ma insciö bria de apogé te porta. 2-1 y l'arbiter sciüra le pröm tēmp.

La prüma chert d'ora dla secunda pert é La Val che à la partida tles mans, cun druch rōia i atacanc gunot dan porta, scialdi é l'ultim passaje che ne gareta nia, l'unica ocasiun d'or é Alex che á, sú dan le portier é la trata massa amez y vëgn insciö tignida sö dal'un dla VB René. Plö tert mëss le defensur da La Val Paolo lascé le ciamp por gauja de n contrast de cé, le tai sura l'edl mëss gnì cují y ne pormët nia de sughé inant. Al 80[^] ti gareta ciamó le terzo gol ala VB, che ti taia les giamas ala formaziun da La Val. Cun le sciür dl'arbiter se rōia spo chësc derby de Copa. Sciode por la formaziun da La Val, che à sumenè tröp mo ne à nia coiü assà. Sëgn él ciamò da aspetè le resultat dla partida anter la Val Badia y le Mölten/ Vöran, che gnarà sugada ai 30 de merz a Mölten.

La Val scomëncia só campionat in sabeda ai 19 de merz dales 15:00 a Prettau contra la squadra de ciasa. I ti augurn a düta la squadra da buna sajun de retüda!